

## ԳԵՏԱՇՆԻ ԵՆԹԱՇՐՋԱՆ.

### Մոսկովեան «Կոլցո» ծրագիրը գործողութեան մէջ

Ակնյայտ են դառնում Գետաշէն եւ Մարտունաշէն հայաբնակ գիւղերը խորհրդային կանոնաւոր զօրքերի եւ ադրբեջանական ՕՍՕՆականների կողմից ոչնչացնելու ռազմական գործողութեան մանրամասները: Ինչպէս արդէն յայտնի է, Մայիսի 1ին Գետաշէնում պատանդ էր վերցուել այդ գործողութեան ղեկավար, գնդապետ Մաշկովը, որն այնուհետեւ փոխանակուեց ՕՍՕՆականների կողմից գերեւարուած կանանց եւ երեխաների հետ: Հենց նրա մօտ էլ յատնաբերուեց գործողութեան ամբողջ ծրագիրը:

Այդ մասին յայտնում է «Ազատութիւն» ռադիոկայանի ռուսական ծառայութեան թղթակից Դմիտրի Կոլչակը: Նրա այդ հաղորդումը եթեր է արձակուել Մայիսի լոյս 7ի գիշերը:

«Այդ գաղտնի փաստաթղթում պարունակուող տեղեկութիւնները, հաղորդում է ռադիոկայանի թղթակիցը, վը հետաքրքրեն ոչ միայն զինուորականներին փորձագետներին, այլեւ մեր ունկնդիրներին, քանզի դրանք բացայայտ ցուցադրում են Գետաշէնի եւ Մարտունաշէնի բնակիչների դէմ Մոսկուայում ծրագրուած գործողութեան ամբողջ թափը»:

Իսկ ահա թէ ինչ է գրուած փաստաթղթում. գործողութիւնը կրում է «Կոլցո» անունը, պատասխանատուներ՝ Խորհրդային Միութեան ներքին գործերի նախարարութեան

ներքին զօրքերի գնդապետ Մաշկով, որի ազդականչն է «Զալի», գնդապետ Միշին, ազդականչը՝ «Կուրգան»: Գործողութեանը մասնակցել են թիւ 5478 զօրամասը, ազդականչը՝ «Միրաժ», վաշտի հրամանատարներ Զաւարսկի, Ռիաբով, թիւ 6477 զօրամասը, ազդականչը՝ «Օբրի», յատուկ նշանակութեան վաշտը, մարտական ուղղաթիռների օդակը, ազդականչերը՝ «Պենալ-1,2,3», «Կրոն-1,2,3 եւ 4», տանկային ստորաբաժանումը, ազդականչը՝ «Կոստիոր», հրանետիչ հաշուարկը, ազդականչը՝ «Պլամեայ»: Գործողութեանը նաեւ մասնակցել են սակրաւորների խումբը եւ ադրբեջանական ՕՍՕՆի ստորաբաժանումները: Փաստաթղթում, - ընդգծում է Դմիտրի Կոլչակը - իհարկէ, տեղեկութիւններ չկային շրջակայ ադրբեջանական գիւղերից այդտեղ թափուած կողոպտիչների խառնամբոխի մասին, որը, լրացնելով զինուորական ստորաբաժանումների ինչ-որ տեղ կիսատ թողածը, հիմնականում զբաղուած էր գետաշէնցիների եւ մարտունաշէնցիների տների թալանով: Ահա այսպէս, դառը հեզնանքով ասում է «Ազատութիւն» ռադիոկայանի թղթակիցը, թող ամբողջ երկիրն իմանայ այդ գործողութեանը մասնակցած իր «հերոսների» մասին: